

## Ils 11 dils 11 allas 11.11

Oz entscheiva il tscheiver. Tradizionalmein vegn l'entschatta dil tscheiver festivada a Sedrun. Sin invit dils Vagabunds vegnan quater ulteriuras musicas da tscheiver a concertar ella halla dalla scola a Sedrun. «Nus havein tertgau ch'ei vegni ad esser bia pli cumpliau d'organisar quella fiasta», declara *Anita Duff*. Ella presidescha ils Vagabunds ch'ei cun 39 commemoras e commembers la gronda gugga ella Cadi. Perquei drovien ei era in certificat per exercitar, naven da 30 seigi quel numnadamein necessaris. La fiasta da sonda hagien ei saviu organisar bunamein sco usitau. Senza certificat (3G) po denton negin entrar en sala ed era igl areal avon la scola ei serraus cun in garter. Il diember d'entradas ei buca limitaus. Per reparter empau la glied preparan ils Vagabunds era ina bar ordaviert. L'entschatta dil tscheiver fust pia planisada, mo co vesa ei ora culs tils e las seras da tscheiver all'entschatta dil 2022. Ils Vagabunds a Sedrun han aunc buca decidu, sch'ei organiseschan il tscheiver da gievgia grassa ni buca. La FMR ha era discurreu cun organisaturs dil tscheiver en autras vischnauncas. (fmr/sr)

## Il tscheiver 2022 stat aunc empau ellas steilas

Oz, ils 11 dils 11 allas 11.11 entscheiva il tscheiver, ton ei cert. Sch'il tscheiver 2022 po denton vegnir festivaus en Surselva ed en tgei fuorma, ei aunc incert. L'entschatta dil tscheiver vegn en mintga cass festivada sonda proxima a Sedrun tiels Vagabunds ch'organiseschan l'occurrenza.

SUSI ROTHMUND/FMR

Sin lur pagina d'internet indicheschon Las Lieurs da Trun ils 19 da fevrer 2022 sco «lur» datum da tscheiver. Sco biaras autras occurrenzas era, stattan denton era ils tils e las fiastas da tscheiver aunc empau ellas steilas. Perquei sa era *Andrea Moser*, la presidenta dalla musica da tscheiver da Trun buca dir la massa il mument. Sco sias collegas e collegs d'autras guggas en Surselva eis ei aunc d'evaluar la situaziun e las pusseivladads da seser ensemen cun responsabels dallas vischnauncas per enzacu decider tgei far ni schar star.

Exercitar pil tscheiver

Dapi l'entschatta october exerciteschan Las Patlaunas da Breil per lur presentaziun a caschun dil tscheiver 2022. Ella vischnaunca da Breil organiseschan Las Patlaunas la fiasta da tscheiver el turnus cun Las Latiarnas da Danis. «Il 2020 ha il tscheiver giu liug a Breil, igl onn vargau negliu ed uonn ei la musica da tscheiver da Danis vidlunder d'organisar», declara *Ricardo Oggier*, il president da Las Patlaunas. «Jeu sperel en mintga cass ch'il tscheiver hagi liug e che nus possien dar suatientscha als invites che nus havein gia retschiert d'autras guggas» di el ed aschunta che las fiastas vegnien probablamein ad haver liug cun obligatori da certificat.

Tscheiver gie – mo en tgei fuorma?

Ella vischnaunca da Mustér ein Las Bagordas da Mustér, Las Fifferlottas da Segnas e l'Uniun da tscheiver Mustér communablamein organisaturas dil tscheiver. Sco *Serafin Beer*, il suprastont da las Bagordas di, han las treis uniuns sonda proxima ina sesida e perquei sappi el aunc buca comunicar pli bia arisguard il program dil tscheiver 2022. Ella rama pusseivla han ei gia procurau uonn per empau atmosfera da tscheiver. «Nus sperein da saver returnar al program usitau il 2022», di Beer ed aschunta ch'ei seigien gia vid exercitar e selegrien da concertar sonda proxima a caschun dall'entschatta dil tscheiver a Sedrun. La finamira seigi d'organisar ton il til e la sera da tscheiver a Mustér sco era la dertgira nauscha, ussa dependi ei mo en tgei fuorma che quei vegni ad esser pusseivel.

### Spiars e gudignau

Il diember da commembras e commembers da Las Bagordas ei cun 31 pli u meins il medem sco avon la pandemia. Empau auter vesa quei ora tier Las Lieurs da Trun. Quella musica da tscheiver dumbra actualmeins 29 commembras e commembers. Avon la pandemia fuvan quei aunc 38. «Certins eran gia daditg ella musica da tscheiver, auters ein s'endisai d'haver dapli temps liber ed ein extrai», di *Andrea Moser* che presidescha Las Lieurs da Trun. Sco ella aschunta seigi ei in hobi intensiv mo bi. Il diember actual da commembras e commembers seigi tuttavia ideals. Dapi il settember exerciteschan ei sut la bitgetta da *Marina Moser*, la dirigenta nova. Las Lieurs da Trun ein era quellas che han envidau il 2020 al tscheiver ch'ei staus per biars ella Cadi la «davosa» gronda party. «Nus selegrein silla party a Sedrun, quella caschun stuein nus nezegiar», manegia *Andrea Moser* ed aschunta ch'ins sappi gie buca co ei mondi vinavon suenter. Sco ella di ein las suprastonzas dallas musicas da tscheiver en Surselva en contact ina cun l'otra.

En tuttacass vegni ei buca a dar a Trun il 2022 in tscheiver sco usitau, mo co quel vegni a veser ora sappi ella aunc buca dir exact. Entochen la fin da november quantien ei d'haver decidiu co e cum. «Ei fuss aschi bi da saver far in tec fiasta e guder in tec normalitad» concluda *Andrea Moser*.

